

Jahresbericht 2012

Agfange hi mir üses Vereinsjahr mit dr erschte vo drei Vorstandsitzige, wo mir üser zwü nöie Vorstandsmitglieder dKatrin Ulrich u d Lilian Kiener hei dörfe begrüesse u so d Aemtli u Ressort zum Teil, nöi verteile.

Churz drufache si mir de mit schön usgschmückte Primeli usgschwärmt, für de Zäziwiler u Mirchler, wo itz aber ime Alters-oder Pflegheim läbe, das Ostergrüessli z überbringe. Das si geng gueti u dankbari Begägnige!

Am 8. Mai hätte mir wöue ga mai-bumme. Wäge heftige Differenze mit em Petrus isch die Sach aber buechstäblich ids Wasser gheit, drum probiere mirs de hür mit eme Verschiebigsdatum...

Ueses Vorstandsässe hi mir hür grad mit dr Rekognoszierig vor Seniorereis verbunde, das heisst mir e feine u gmüetliche Abe am Thunersee verbrunge.

Für e Vereinsusflug vom 13. Juni hi sich bis zum Amäudeschluss nume sehr weni agmäudet, drum het üsi Reiseleitere d Barbara, churzerhand statt e Car e chline Bus chönne organisiere. So si mir de bi ziemlichem Huduwätter gäge z Oberaargau zue, nach Wange a dr Aare. Bim Usstiege uf em Hof vor Familie Hess isch ihm e herrliche Duft vo Fichtenadle id Nase gstiege, ja es hätt ihme richtig gluschtet, e so es warms Bad z näh..

Dr Herr Hess u Friedli vo dr Firma Swissessences, das si nün Buure u e Biologin hi üs de verzellt u erklärt was sie aues für Pflanze aboue u us weune Teile sie die Destillat de gwinne u zu hochwärtige Körperpflegeprodukt verarbeite. Mir hi chönne schmöcke, saube u chufe u für üser Händ chli z werme es Kafi mit Cake gniesse.

Dr Räschte vom Namitag hi mir die schöni Barockstadt Solothurn mit em Rageschirm, unsicher gmacht. Mir hi glädelet u käfelet u im Restaurant Ramadan es feins Znacht gnosse. Zur Krönig vom Tag hets bim hifahre e wunderschöne dopplete Rägeboge über Zäziwil gha.

Am 4. Septämber si mir mit 69 Reiseluschtige zur Seniorereis gstartet. Ufere rächt abentürliche aber intressante Fahrt isch es via Heiligenschwendi über Tschingel gäge Sigeriswil zue. Ir schöne Chiuche ob em Thunersee het üs d Cornelia Fuhrer mit em passende Orgelestück“ E gschänkte Tag „ empfangen u em Pfarrer Harald Doepner hi mir bire churze Andacht chönne zuelose.

Nacheme Fährtli ume Thunersee hi mir bim Gwattzentrum e Halt gmacht u es feins Zvier-Znacht dörfe gniesse. D Chiuche-Kollekte vo däm Tag isch er Hüslimatt-Tagesbetreuung, Oberthal z guet cho, sie hi sich hätzlich gfröit u löh lieb la danke.

Ar Gwärbusstellig wo über e Bättag het stattgfunge, het sich üse Verein, zwar ziemlich versteckt, are Vereinswand dörfe präsentiere.

Ueber zwe Tag hi mir dank freiwillige Hälferinne o üsi Brockestube chönne offe ha. Potz tusig hi die Sache gmingeret u im Kässeli hets sehr erfreulich usgseh.

Aehnlich guet isch es o er Brächete gloffe, mir hi auso nach dene zwene Anläss grad 2600.-Franke meh im Brockikässeli gha.

6. Novämber, das isch dr Pousemilchtag gsi, wo mir aune Chindergarte- u Schuelching vo Mirchel u Zäziwil hi dörfe e Bächer Milch usschäiche, meischtens mit Ovo drinne, will wie heists doch: mit Ovo chaschs nid besser aber lenger... organisiert u zahlt wird de Anlass vom schwizerische Milchproduzänteverband.

Am Adväntsabe vom 27. Novämber het üs Dina Feller e Chratte voll amüsanti, luschtegi, spannendi aber o nachdänklich Märli für Erwachsene mitbrunge, frei usem Buch use verzellt u so guet usgschmückt, dass me sich s grad läbhaft het chönne vorstelle. Schad hi so weni Zyt gfung für a däm Märlihafteabe teil z näh.

E grossi Freud het de die Heilpädagogischi Schul u Wohngruppe Nils Holgerson zeigt, nachdäm mir ihne e Kollekte vo 250.- Franke hi dörfe la zu cho. Sie wärde das Gäld ines Projekt stecke wo sie de mit de Jugendliche zäme dr Umschwung bire Wohngruppe nöi gstatle.

Gli druf hi mir üs de uf d Socke gmacht, um im Uftrag vor Gmeind Zäziwil, d Wiehnachtsbscherrig z vertrage -o das isch e dankbari Arbeit, cha me doch grad i dere Zyt viune Lüt e Fröid mache.

Einsiedle-Wiehnachtsmärit, so het am 7. Dezämber z ds Ziel vom e Car vou Froue gheisse. Bi sehr prekäre Strasseverhältniss, aber ere zauberhafte Winterlandschaft het üs dr Pesche Zwahle sicher u ruhig nach Einsiedle gfare. Es isch scho fasch kitschig schön gsi die Kulisse; ds mächtige u prächtige Chloschter im Winterchleid mit dene viune Liechter vo Wiehnachtsmärit! Voll Idrück si mir de gäge Mitternacht sicher u ganz ume heicho.

Uf e 13. Dezämber hi d Ungerschüler vo Mirchu planget. Sie hi nämlich für d Seniorewiehnacht ds Musical „D Müsli vo Nazareth“ igstudiert u üs mit viune Lieder u luschtige Theaterszene beschtens ungerhauté. Nach paarne Wort vom Pfarrer Doepner hi mir de es feins Zvieri gnosse u üs de o no grad bim Greti Gfeller, so säge, für die langjähri Zämearbeit bedankt u verabschiedet. D Kollekte vo däm Namitag hi mir dr Schuel-u Gmeindsbibliothek Zäziwil übergäh. O da danke die Verantwortliche hätzlich, sie wärde so o wieder nöis Material chönne aschaffe, wo schlussändlich aui chö profitiere.

Am 11. Jänner hi mir Vorstandsroue üs dra gmacht, für d Brockestube uf z rume z erläse u z putze. Näbscht den zwene Aläss im Herbscht hi mir d Brocki 11 mal offe gha. A dere Stell danke mir ar Renate Haldimann ganz hätzlich. Sie het sich u ihres Telefonnummero als Brockestube-Aloufstell zur Verfügig gstellt. Aus Entschädigung für ihrer Umtriebe, lade mir sie zum Brockestubeässe i, wo mir im Jänner im Mirchubeitzli hi dörfe gniesse.

Phenomenal hets am 20. Jänner ir Chiuche Grosshöchstette tönt, wo d Kirchmeind aus Dankeschön, a aui Freiwillige, zume Konzärt iglade het. Mit wunderschöne Lieder hi eime die vier flotte Manne vo Phenomen richtig i Bann zoge.

Zum zäme ässe het sich e meh oder weniger grossi Tschuppele elf mau ir Chrono troffe. A der Stell danke ig dir Ruth ganz hätzlich, dass du aube d Anmäldige entgäge nimsch u witerleitisch..... O au dene wo süsch denn öppis zur Ungerhautig bitrage es hätzlichs Danke. Mir hoffe fescht, dass i Zuekunft vielich ume meh die Glägeheit nütze, für ire luschtige Gsellschaft es feins Aesse z gniesse.

Zum Kursjahr wärde öich anschliessend di Kursverantwortlich informiere.

Zum Schluss wett ig ganz eifach au dene Merci säge. wo üse Verein über z Jahr, i irgendere Art ungerstütze u mithälfe.

Renate Nussbaum